

NAMIBIA SENIOR SECONDARY CERTIFICATE

FIRST LANGUAGE OSHIKWANYAMA ORDINARY LEVEL

4105/3

PAPER 3 Literature

2 hours

Marks 60

2019

Additional Materials: Answer Book

INSTRUCTIONS AND INFORMATION TO CANDIDATES

- Write your answers in the Answer Book provided.
- Write your Centre Number, Candidate Number and Name in the spaces on the Answer Book.
- Write in dark blue or black pen.
- Do not use correction fluid.
- Answer **three** questions, **one** from Section A **Poetry**, **one** from Section B **Prose** and **one** from Section C **Drama**. Of the three answers, **one** must be an essay.
- Pay attention to spelling, punctuation and sentence structure.
- The number of marks is given in brackets [] at the end of each question or part question.

OMALOMBWELO NOMAUYELELE KOVAHONGWA

- Nyola omanyamukulo oye mEmbo lOmanyamukulo olo wa pewa.
- Nyola Onomola yOsenda, Onomola yEkonakono nEdina loye kEmbo loye lOmanyamukulo.
- Nyola nopena imbulau ile ilaula.
- Ino longifa okadimifo komeva.
- Nyamukula omapulo **atatu**, **limwe** okudja mEtukulwa la-A lOutevo, **likwao** okudja mEtukulwa la-B lEeprosa **nalikwao** otali di mEtukulwa la-C lEedrama. Epulo **limwe** lomwaa atatu nali kale ekwakhokololwa.
- Kotokela esipelo loitya, elongifonawa loileshifo netungo lomatumbulo.
- Omwaalu waitwa owa yandjwa moikondekifombine [] konima yepulo keshe ile yoshitukulwa shepulo.

This document consists of **9** printed pages and **3** blank pages.



Republic of Namibia
MINISTRY OF EDUCATION, ARTS AND CULTURE

ETUKULWA A: OUTEVO

Metukulwa omu hoolola mo epulo **limwe** alike.

- 1 Lesha okatevo taka shikula ka dja **Oifala noikuko** ku **J. Nghishiilenhapo**, ndele to nyamukula omapulo aeshe.

Omulunga tau lili omumwahodi

Omulunga tau nyenyeta,
 Omahodi taa pololoka,
 U li ofika wa fa wa kanghwa,
 Wa nyengwa 'kukwena moule,
 Shaashi oshinim' osha kula.

Omahodi ngaa nee taa di mo,
 Wa nyengwa okuhekumuna,
 Tau popil' ashike momwenyo.
 Akutu hewa fy' omilunga,
 Oshike twa ning' omunhu,
 Shihe fi mbela nokufutwa?

Oshike twa ninga hano?
 Tu dul' okuya moikoya,
 Ku ningwe nand' oihokolola,
 Tu ka taingale ngaa nee,
 Shamha ngaho twa uda nawa,
 Eshi twa nyonen' omunhu.

Onda ning' omafiku nda pwaalala,
 Hai tale vakwet' eshi va ningwa,
 Hai ti mongul' aame ndi li ko,
 Shilishili naame nda yukiwa,
 Ku na naau to pula,
 Shipu u xukul' ehodi.

Vanhu vaKalunga nye,
 Oshike twa ninga hano?
 Kamu shii ku tu fil' onghenda?
 Natiili hatu ku ifana,
 Tatekulu u tu popile,
 Oshiponga eshi u shi hanyene.

- (a) Omutevi okwa li e uditile ngahelipi oshinima osho ta hokolola? Yandja oitwa **ivali** ndele to i koleke. [4]
- (b) Omutevi okwa holola ngahelipi lela kutya ina panda oshinima osho ta hokolola? Yandja oitwa **itatu** ndele to shi koleke. [6]
- (c) Omutevi okwa longifa ngahelipi enhupeko, a ete pouyelele etumwalaka lokatevo kaye? Shi holola noitwa **ivali** ndele to yandje omatomheno. [4]
- (d) Omutevi okwa etela omuleshi omaliudo elipipo, eshi wa li to lesha okatevo aka? Shi holola noitwa **ivali** ndele to yandje omatomheno. [4]
- (e) Omutevi okwa longifa omupresona elipipo mokatevo aka? Yandja etomheno. [2]
- [20]**

ILE

- 2 Lesha okatevo taka shikula, ka dja **Omatevelo** 4 ku **A.L. Nghifikua**, ndele to nyamukula epulo la pulwa.

Onghalamwenyo hamukundu

Ino fy' ohoni omulaulu woshipa shoye,
Owo efimano nomutumbo woye washili,
Tau holola kutya oovelela,
OmuAfrika washili kokudalwa.

Ino fy' ohoni eexwiki doye de litonya,
Eyulu lixupi nomesho oye oshilaule,
Ei aishe oyo oundombwedi wolela,
Tau holola ondilo yoye yopaunhu.

Ino tala oluvala, tala ounhu,
Omulaule nOmutilyane kave lidule,
Aveshe ove nondilo imwe yopanhu,
Nande koshipa neexwiki va yooloka.

Ino dina nande omunhu molwoluvala,
Momayakulo meembelewa nomeeposha,
Ovalaule novatilyane aveshe kumwe,
Eyakulo li fike pamwe tava pumbwa.

Ovakulunhu pakudalwa nopakuyelwa,
Voludi keshe u fimaneke shi fike pamwe,
Omulaule nOmutilyane kave lidule,
Nokoshipala shOmushiti aveshe vamwe.

Eholoko loye komunhu keshe lungamena,
Li yandje shili oshihopaenenwa tashi tungu,
Efimbo eli okwa pumbiwa onghalafano,
Ya hokiwa kovanhu aveshe vomoshilongo.

Mohole yaye, hamoutondwe Kalunga a shita,
Oiwana ihapu mounyuni ya yooloka,
Meyooloko lomaluvala Kalunga a hala,
Ewapalo meshito laye li monike.

Oluvala noludi itali dulu,
Okukelela tu kalafane ngovanhu vamwe.
Ovalaule novatilyane mongudu imwe,
Eedi domufita umwe moshiunda shimwe.

Outondwe neshekafano kali na onhele,
Momitima di na oukriste nohole yashili,
Onghalafano yOvakriste yokedu eli,
Nai kale oshihopaenenwa shomeulu.

Kalunga umwe aeke twa itavela,
Ohonde imwe aike twa kulilifwa,
Meulu limwe alike twa teeelwa,
Omwenyo umwe auke hatu ka pewa.

Hokolola nghene omutevi a hala oku tu hololela ongushu youfike pamwe mokatevo aka.

Shi ninga noitya **250 – 300**.

[20]

ETUKULWA B: EEPROSA

Moshitukulwa eshi nyamukula mo epulo **limwe** alike la kufwa **mOlupafu la twa eisho** ku **P.N. Hamutenya** ile mu**Wanashipolo a ya nomwenyo mofuka** ku **T.N. Shakujungua**.

- 3 Lesha okahokololo aka ka dja **mOlupafu la twa eisho** ku **P.N. Hamutenya** ndele to nyamukula omapulo taa ka pulwa kuko.

“Ovaenda ihava findikilwa, otava kala vehe uye vali. Tu ye ngo nee pamwe ove ino fa ovaenda vamwe ava ihava aluka ngee va findikilwa.”

Kristine okwa findikila omumati waye, Veino. Kristine ota kondjifa ngeno, opo va ende va shaama, ndee Veino okwa hala oku mu lambalala. Kristine okwe mu kwata mokwooko, opo va ende va shaama. Veino okwa li e udite nawa ine shi mona nale. Ounyala vomupangi ova fa ashike vohanana. Osho ve lifindikila fiyo va lekelifana okuya komaumbo. Kristine eshi a ya meumbo okwa hokololela ina adishe odo va popya naVeino. Fiku olo ina kofa ohaku ti ngaho eshi ta fefekele, ye okwa fa e wete omesho aVeino eembutu tae mu tale. Veino naye ka kofele fiku olo, okwa fa ashike e wete e kwete ounyala vaKristine va fa hava tuvikilwa moshikefa. Mukwamhalanga okwa twa omona omukumo kutya epata looKristine ohali hombolwa, lo vali oli yadi ovanhu hava longo. Veino okwa shuna koAub koilonga naKristine okwa shuna koShakati.

Veino eshi a fika koAub okwa shangela Kristine ombilive, opo e mu lombwele kutya okwa fika nawa koilonga. Enenediladilo laye oku mu lombwela kutya, oku na oku ka shiivika diva ile e ke limbole, ngaashi naanaa e mu lombwela kutya ove na okuninga oshivilo shavo shehombolo pexulilo lomudo.

Kristine naye okwa alula ombilive yaVeino diva. Okwe mu lombwela kutya ote ke lilombola kEndola keumbo lavo, shaashi kwinya kOnanghulo okwa li ashike a ka talela po ina mumwaina waina.

Efiku limwe Veino eshi a dimbuka, okwa hanga ombilive i li pombete yaye. Okwe i patulula mo ndee ta hange mo efano laKristine. Okwa li a hafa neenghono. Veino eshi a lombwela kaume kaye Dlamini kombinga yokakadona kaye, nosho yo kombinga yelilombolo, ova lekela koilonga, opo ve uye keumbo. Eshi va fika meumbo, ina okwa li a hafa unene. Veino okwa kufa ofewa yoSunlight ndee ta pe ina. Ina ka li e udite nawa, shaashi okwa li ta diladila kutya, eshi i na pewa sha oinima aishe otai twaalelwa kEndola kuKristine.

Veino nakaume kaye ova ninga elongekido lokuya koutenya. Manga inava ya, ova tuma omutumwa koShakati kutya, ove na okuya keumbo looKristine. Elao linene, shaashi Kristine okwa hangwa e li mefudo lomafiku avalu. Ove va shiivifila kutya otava ka holoka mOlomakaya. Manga nee inava ya, Mukwamhalanga okwa lombwela omona kutya ina yandja nande oimaliwa ihapu kuKristine, shaashi naye oha longo. Veino okwa dimina ngoo nande ine litula mo melombwelo laina. Xe okwe va lombwela, opo va kale ovangungu-mani koipala yovadali vomuvalekwa wavo, opo vaha tekwe oisho.

Veino okwa konga kaume kaye Eliab, opo e va findikile noshihauto koutenya kEndola. MooHailaula omwa li mwe ya ookaume kaKristine vavali, aveshe ovapangi mOshakati. Josefina okwa ka kunda oitenya kolupale noku i twala konduda yovaenda. Kristine okwa ka lombwela xe naina, opo ve uye va kunde omweenda. Ovakulunhu ove uya monduda yovaenda, ndee tava popifa ovaenda. Josefina okwe va pa mo momalodu, ndele ta fikama a ka longekide oikulya kepata. Veino okwa li e li omutumba okwa hovela ta ti ngaha: “Tate nameme shiimba Kristine okwe mu lombwela ngoo kutya otamu ka mona ovaenda nena. Ovaenda ofye nee ngaha otwa fika. Eshi she tu endifa okushiivifa kutya Kristine oku li omuvalekwa wange. Onde lineekela ngoo kutya okwe shi mu lombwela nale.” “Ewa, otwa uda ko mumati. Eshi wa popya osha yela, Kristine okwe shi hepaulula. Paife mumati wange onda hala ashike u nyamukule omapulo ange aa: Lotete, okakadona kange aka oke na oshivoyo mokanya, owe ka tala ngaho nawa? Pamwe otaku ti ngaho eshi to ka mona oshivoyo shako, ove oto ti ino hala vali? Etivali, okakadona aka oke na ondede, nomushi oo ihaka dulu, oto ke lididimikila ngaho omunhu ehe shii nokutwa? Epulo lange laxuuninwa kwoove ole li, okaana aka kokamwange noshifima osho kehe shi okuteleka, oto ka lya ngaho omatepi mhedi?” “Heeno tate. Omapulo aeshe atatu we a pula nge ohandi dulu oku e lididimikila. Onda tokola Kristine a ninge omuvalekwa wange,” osho Veino a nyamukula xemweno. “Ove Kristine omulumenhu ou we tu etela apa, owa mona ngaho kutya oku na epalu mekofi? Kristine mumwange owa hala oudjuu, omulumenhu ou okwa dja kokule, pamwe oto ka dengelwa ko komakule oko?” Natango omushamane Hailaula ta pula.

“Ahowe tate omapulo aeshe oo onde e litokolela. Veino oye omuvaleki wange” Kristine ta nyamukula xe.

- (a) Omunyoli wehokololo eli okwa tukululila omuleshi omaliudo elipipo kombinga ye endelo lokakadona? Yelifa enyamukulo loye we likwatelela kokaleshwa aka. [2]
- (b) Omunyoli wehokololo eli okwa ulika ngahelipi Veino kutya omulineekelwa? Yandja oitwa **ivali** ndele to yandje omatomheno. [4]
- (c) Omaitavelela nomalwaambo okwa etela ovanyandi mokahokololo aka oilanduli ilipipo? Tofa mo **avali** ndele to yandje yo omatomheno a dja mokaleshwa aka. [4]
- (d) Omunyandi elipipo hatu luku omupotokononi mehokololo eli? Shi yelifa. [2]
- (e) Ovakulunhu vaKristine ova longifa ngahelipi omapulo ouretori okushonga Veino naKristine va holole etokolo lavo lohombo? Shi holola noitwa **ivali** ndele to shi koleke. [4]
- (f) Yandja oitwa **ivali** tai holola nghee omunyoli wehokololo a longifa omipopyofano, a yelifa etumwalaka laye, ndele to shi koleke. [4]

[20]

ILE

4 Wanashipolo a ya nomwenyo mofuka ku T. N. Shakujungua

Eyeletumbulo eli “Odi i pipima hinga nai ke litwe momuhana” ola yelifila ngahelipi omuleshi etumwalaka loshinyandwa eshi **Wanashipolo a ya nomwenyo mofuka**.

Shi ninga noitya **250 – 300**.

[20]

ETUKULWA C: EEDRAMA

Metukulwa omu hoolola mo epulo **limwe** tali di m**Omapumhumu taa yolele Oulipamwe** ku **V. Munyika** ile **Mushakati waNelao** ku **E.T. Ndadi**.

- 5 Lesha okahokololo aka ka dja mu**Mushakati waNelao** ku **E.T. Ndadi**, ndele to nyamukula omapulo taa ka pulwa kuko.

Malakia okwa ka lekela ovaneumbo eshi ve li pokuya. Manga ve li po, Mukwamhalanga okwa dja ko nokavela komaadi eengobe, okashako kombidi i li mumwe nomavanda nokambao va dile mo omalodu avo. Ondjila oya li iwa novamati ova fika nawa.

Eshi va fika omumati ou womeumbo okambao okwe ka pa xekulu, shaashi naye oku a hole e dule nokuli omutekulu. Oinima ikwao okwe i twala kuinakulu kepata. Omalodu omawa inaa fa nokuli a enda ondjila ile. Omukulukadi okwe uya a lombwele mwene eshi a etelwa, e uye okwa hanga vali mukwao a dika.

Mukwaanime: Hai ti mona waa, omumati mbela okwa dja meumbo lelenga, oinima ngaa ei nda etelwa oko!

Victor: Shitiwa onde ku pa mo ngaa hano Mukwaani?

Mukwaanime: Onda teelega ngaho mbela u dje enota manga.

Eino: *(ta lombwele xekulu ondjila yavo yokOukwanyama)* Tatekulu kwinya otwa fa ashike twa dengela ko ongodu, otwa hanga ovakulunhu tava i komambo, ndele ounona apa ngaa va lombwelelwa va viyauke opo ngaa ndihe shi. Shitiwa eshi twa ya otwa twaalela ovanamaonda ndele naashi twa aluka natango otwa londeka ngaho ovanhu vamwe. Mukwetu okwa ti oimailiwa nandi i ete kwoove oyo ei N\$700. Hanga nda dimbwa, ovakulunhu vaye ova ti kutya omumati wavo eshi ve mu shii oku na omikalo, ashike ovanhu ihave lineekelwa. Apa ta ningi nai vati mu pukululeni.

Eino eshi a ya, omushamane Victor okwa lombwela Mukwaanime kutya ye okwa ninguluka. Okwa hala Malakia a kale ha shingi okabesa ta i mopate, shaashi ngehe a eta oimaliwa i fike opo kuye mwene, ngeenge omoilonga mbela?

Mukwaanime: Ou li mondjila tate, ndele ngaashi nee komafululu, otaku shiiva ngaho okabesa? Shapo otaku shunwa ashike oitenda kotuwa ei va ile nayo, opo a kale a manguluka nande ngeno omunhu e na oinima ihapu ta twalwa peumbo.

Malakia eshi a aluka, Victor okwe mu lombwela ondunge oyo e na po, yokutya okwa hala e mu pe okabesa, ashike ote lipula kutya otake ke mu monifa oixuna. Okwa ka tokola va ka tule oitenda kotuwa. Omushamane Victor okwe mu lombwela a hovele mongula ei tai pi oshikundu. Okwe mu lombwela yo kutya, ngeenge ope na vokomukunda wavo tava twaalelwa ndele etango ola toka, kape na omukundu. Ota dulu ashike okuya keumbo e ke di mbestele.

Ongula eshi kwa sha Malakia ova popifafana novaneumbo, okwa ya monduda yokulila, ndele ta nu okafiwa ndele ta i mondjila. Eshi e uya pokamwandi, ovanamaonda opo e va hanga, okwa hala ashike nokuli ava va yuka kokule. Ota londeke. Ololo la yuka mo moushilo omo, divadiva ola aluka nale, natango okwa hanga po vamwe, okwa ninga etokolo nale kutya ota ka nangala ashike keumbo. Ovanamaonda ovahapu. Okwa ninga oshivike ashishe ina enda ko kOshakati. Okwa shuna ko Olomakaya komatango, ye a pite ongula yOsoondaxa ta twikile oilonga yaye.

Omushamane okwa li a hafa, oimaliwa ngaho oyo ya etwa komumati naye okwa mona kutya mboli ina pashuka natango. Omumati okwa longa, ouwa waye natango, ke fi mbudi ngeno okwa dengela odi peisho. Malakia okwa kala omuunguli, onghee oku shii nawa ovaunguli nghee hava futifwa. Osho a kala ta longo nawa ngaha fiyo efudo la pwa ko. Okwa futwa nawa, naye ote liyolaifa ashike, a ninga nokuli nodula kokambo kaye kombaanga inaku tulwa sha haku kufwa ashike. "Iyaloo, Kalunga kange na kwafe nge natango ndiha kanife elao lange".

- (a) Omushangi okwa longifa ngahelipi oiningwanima moshinyandwa eshi, e tu etele pouyelele kutya Malakia ka li e na ombudi moilonga yaye. Shi yelifa. [2]
- (b) Omushangi okwa hala oku tu honganga shike mokahokololo aka Mushakati waNelao? Shi yelifa noitwa **ivali**. [4]
- (c) Victor okwa li e udite ngahelipi eshi a etelwa oimaliwa kuMalakia molweendo laye lotete? Shi koleka. [2]
- (d) Yelifa kutya omushangi okwa longifa ngahelipi omunyandi Neudo, a honge ovaleshi eenghedi. Shi koleka. [2]
- (e) Omalihumbato aMalakia okwa eta ngahelipi pouyelele exuku lehokololo eli. Shi koleka noitwa tai di moshinyandwa eshi. [10]
- [20]

ILE

6 Omapumhumu taa yolele Oulipamwe ku V. Munyika

Omushangi woshinyandwa eshi **Omapumhumu taa yolele oulipamwe**, okwa tukululila omuleshi omaliudo elipipo kombinga yaLusia? Hokolola noku shi yelifa nawa noitwa tai di moshinyandwa eshi.

Shi ninga noitya **250 – 300**.

[20]

BLANK PAGE

BLANK PAGE

BLANK PAGE

